

Program Singgah Sahur UMP Erat Hubungan Dengan Masyarakat



Kuantan, 10 Julai- Seramai 200 orang di kalangan staf dan pelajar Universiti Malaysia Pahang (UMP) bersama Gabungan Kelab Kereta Negeri Pahang menganjurkan Program Jom Singgah Sahur UMP. Program mendapat kerjasama daripada Waja Performance Club of Malaysia, Auto Speed Owners Club (ASoC), Exora Owners Club Malaysia (EOCM) dan My Alza Owners Club Malaysia dan Persatuan Wanita UMP (Matahari).

Majlis pelepasan konvoi disempurnakan Pemangku Pendaftar, Abd. Rahman Hj. Safie di perkarangan Dataran Canseleri UMP Gambang melibatkan 50 kereta jenis Alza, 37 kereta Waja, 30 Exora dan 30 motorsikal.



Menurut Naib Canselor UMP, Profesor Dato' Dr. Daing Nasir Ibrahim berkata, tujuan program diadakan adalah bagi merapatkan hubungan antara pelajar dengan orang luar serta memasyarakatkan kampus.

"Program juga memfokuskan petugas yang bekerja pada waktu malam terutamanya di kalangan penjawat awam dan agensi kerajaan yang menjaga keamanan dan keselamatan berkonsepkan singgah bermesra dan menyerahkan sumbangan juadah bersahur kepada mereka," katanya. Beliau hadir bersahur bersama isteri, Datin Fazia Ali untuk bertemu dengan anak-anak yatim dari Rumah Anak Yatim dan Miskin Nur Iman Sg. Soi. Hadir sama Pengerusi Jawatankuasa Pembangunan Wanita dan Keluarga, Komunikasi dan Multimedia Negeri Pahang, Dato' Shahaniza Shamsuddin.



Ujar beliau, program yang melibatkan pelajar dan staf UMP serta komuniti setempat ini dapat merapatkan hubungan di antara peserta dan masyarakat luar serta memahami kehidupan bermasyarakat dan memupuk nilai-nilai murni peserta.

Selain itu, peserta turut cuba menyelami suasana bersahur pihak beruniform seperti pasukan Polis Diraja Malaysia (PDRM), Kementerian Kesihatan Malaysia, Bomba, Jabatan Pertahanan Awam Malaysia (JPAM), RELA dan Jabatan Pengangkutan Jalan (JPJ) yang bertugas menjaga keselamatan dan ketenteraman awam terutamanya pada waktu malam hari," katanya.



Sementara itu, penyelaras program, Badrul Naim Abidin berkata, program ini memberi peluang kepada peserta konvoi untuk makan sahur bersama-sama serta memupuk kesedaran para peserta betapa pentingnya kasih sayang untuk dirasai oleh anak-anak yatim dan miskin ini. Penyertaan kali ini turut disertai pelajar Maktab Rendah Sains Mara (MRSM) Tun Abdul Razak Pekan seramai 40 orang yang hadir memeriahkan program.



Konvoi dibahagikan kepada tiga laluan melibatkan lokasi Maahad Tahfiz Muhammadiyah Bukit Rangin, Anak Yatim Amal Hembusan Kasih Taman Guru, Jabatan Penjara Penor, Anak Yatim MABIQ dan Permatar Camar. Laluan kedua adalah Balai Polis Gambang, SMA Seri Mahkota, Balai Polis Gambang, Balai Bomba Taman tas dan Jabatan Pertahanan Awam Malaysia manakala laluan ketiga adalah Tol Lebuhraya Pantai Timur, Balai Bomba, Hospital Tengku Ampuan Afzan, IPD Kuantan, Balai Bomba Bukit Ubi, Rumah Anak Yatim D'nasti dan berakhir di Rumah Anak Yatim dan Miskin Nur Iman Sg. Soi.

Posted By : NOR FADZILLAH BINTI ZULKIPLI Date Posted : 13-07-2015, 09:30:56